



SAQQAA

UPA 2012/imm. 88-imi Inatsisartut aalajangererat

naapertorlugu

UTOQQALINERSIUTILLIT ISERTITAANNUT

KILLILIUSSAT ALLANNGORNERANNIK

NALILERSUEQQISSAARNEQ

**UTOQQALINERSIUTILLIT ISERTITAANNUT KILLILIUSSAT ALLANNGORNERANNIK  
NALILERSUEQQISSAARNEQ**

**Imaasa allattorsimaffiat:**

**1.0 Tunuliaqut**

**2.0 Aallaggaasiut**

**3.0 Kajumissuseqaleriaatsit iluatsittuunngitsut**

**4.0 Sunniuteqaqatigiinnermi ajornartorsiutit**

**4.1 Illugiilluni pilersoqatigiinnissamut pisussaaffimmik allannguinerit**

**4.2 Pisortanit pisartakkat allat**

**4.3 Siusinaartumik soraarnerussutisianut naleqqiullugu utoqqalinersiutit  
allanngornerat**

**4.4 Tunniunneqartartut allanngortinneranni siunissami pisinnaasut**

**4.5 Allannguutit utoqqaat pillugit periusissamut ilanngullugit eqqarsaatigisat**

**4.6 Sulisogarnermut tunngatillugu siunissamut takorluukkat**

**4.7 Utoqqalinersiutit isertitat naapertorlugit naleqqussartarneqartarnerisa  
peernerat**

**5.0 Inaarutaasumik naliliineq**

# UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

## 1.0 Tunuliaqut

UKA 2012-imi imm. 88-ip Naalackersuisunit suliarineqarneranut atatillugu allannguutissatut siunnersuut tulliuuttoq akuersissutigineqarpoq:

*Utoqqalinersiutillit utoqqalinersiutiminnit ilanngaaffigineqaratik marloriaammik saniatigut isertitaqarsinnaanerisa kingunerisassaasa tamarmiusut qulaajaaffigineqarnissaat, Naalackersuisullu utoqqalinersiutit pillugit ataatsimoortumik iluarsartuusseqqinnerannut nalilersueqqissaarnerup tamatuma ilaatinneqarnissaanik Naalackersuisut kingusinnerpaamik UKA 2012-imi nalilersueqqissaarnermik saqqummiussinissaat pillugit Inatsisartut aalajangiussassaattut siunnersuut.*

Isumaginninnikkut pisartakkat assigiinngitsut naleqqussarnerini, ilanngullugit utoqqalinersiuteqarnissamut isertitanut killiliussat allanngornerisigut, aningaasatigut kingunerisassat siulittuutiginnissaannut ullumikkut erseqqivissumik naatsorsueriaaseqartoqanngilaq. Aammattaaq Akileraartarnermut Atugarissaarnermullu isumalioqatigiissitat 2010-mi nalunaarusiaata malitsigisaanik iluarsartuusseqqinnermik annerusumik aallartitsisoqarpoq, aningaasaqarnerup kajungilersitsisussallu imminnut sunneqatigiittarnerat tassani ataatsimoortumik eqqarsaatigineqarluni. 2025-mut pilersaarut innersuussutigineqarpoq.

Nalilersueqqissaarnermi matumani teknikkikkut naatsorsuinerit tunngavigineqanngillat, assigiinngitsutigulli isiginninnernut ajornartorsiutinullu saqqummiunneqareersunut naleqqiullugu kingunerisassat qitiutinneqarlutik, taamaasilluni taakku suliaqarfimmi allannguinnissamik suleriaqqinnermi ilaatinneqarsinnaassammata.

Oqaatigineqassaaq utoqqalinersiuteqariaaseq tunngaviusumillu ajornartorsiutit tamatumunnga attuumassuteqartut Akileraartarnermut Atugarissaarnermullu Isumalioqatigiissitap nalunaarusiaani erseqqissumik allaaserineqarmata, pingaartumik kapitali 8-mi allaaserineqarlutik. Kapitalimi tassani Nunatsinni utoqqalinersiuteqarnermut

## UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

aaqqissuussinerit sukumiisumik misissorneqarput. Taassumap iluani isumaliutigisariallit malunnaatillit kiisalu taakkununga aaqqiissutissatut siunnersuutit.

### 2.0 Aallaqqaasiut

Aalajangiussassatut siunnersuut (UPA 2012/88), Ilaqutariinnermut Peqqissutsimullu ataatsimiititaliap isumaliutissiissutaa kiisalu Inatsisartuni oqallinneq aallaavigalugit oqaatigineqarsinnaavoq, siunnersuummut siunertarineqartut pillugit nalinginnaasumik isumaqatigiittoqarmat, taakku tassaallutik,

- Utoqqaat suliffeqaannarnissamut aningaasaqarnikkut piumassuseqartuaannarnissaannik nalinginnaasumik kissaateqarneq.
- Sulisoqarnermut tunngasuni inuiaqatigiit piginnaasanik sapinngisamik amerlanerpaanik pisariaqartitsinerannik nalinginnaasumik kissaateqarneq.

Siunnersuut tunngaviusumik unammilligassanik marluusunik kinguneqarpoq.

Siullertut, siunnersuutip saqqummiunneqarnermisut isikkoqartilluni kingunerissavaa **kajumissuseqalersitseriaatsikkut** utoqqalinersiutillit ilaat sulinerulernermikkut aningaasanik ikinnerusunik pisalernissaat.

Aappaattut, siunnersuutip saqqummiunneqarnermisut isikkoqartilluni kingunerissavaa assigiinngitsutigut **aappariinnermi ajornartorsiutit**. Nalilersueqqissaarnermi matumani taakku nassuiaatigineqassapput.

**UTOQQALINERSIUTILLIT ISERTITAANNUT KILLILIUSSAT ALLANNGORNERANNIK  
NALILERSUEQQISSARNEQ**

**3.0 Kajumissuseqaleriaatsit:**

Utoqqalinersiutit pillugit Inatsisartut peqqussutaat nr. 3, 7. maj 2007-imeersoq naapertorlugu utoqqalinersiutilinnut isertitanut killiliussat atuuttut § 8-mi takuneqarsinnaapput.

Utoqqalinersiutit allanngortinnagit isertitanut killiliussat	Utoqqalinersiutit qaqugukkut atorunnaarnissaanut killiliussat	Katissimasut/kisermaat <sup>1</sup>
0 - 56.000	228.000	Kisermaat
0 - 70.000	300.000	Aappariit (utoqqalinersiutilik / siusinaartumik soraarnerussutisialik)
0 - 84.000	318.000	Aappariit (utoqqalinersiutilik / utoqqalinersiutilik)
0 - 84.000	318.000	Aappariit (utoqqalinersiutilik / pisartagaqanngitsoq)

Siunnersuutip saqqummiunneqarnermisut isikkoqartilluni tulluuttunik tulluarsaanissaq kingunerissavaa:


Utoqqalinersiutit allanngortinnagit isertitanut killiliussat	Utoqqalinersiutit qaqugukkut atorunnaarnissaanut killiliussat	Katissimasut/kisermaat
0 - 112.000	228.000 (284.000)	Kisermaat
0 - 140.000	300.000 (370.000)	Aappariit (utoqqalinersiutilik / siusinaartumik soraarnerussutisialik)
0 - 168.000	318.000 (402.000)	Aappariit (utoqqalinersiutilik / utoqqalinersiutilik)
0 - 168.000	318.000 (402.000)	Aappariit (utoqqalinersiutilik /

<sup>1</sup> § 8 imm. 3 naapertorlugu utoqqalinersiutillit namminneq isertitaqanngitsut utoqqalinersiutillip kisermaap pisartagaasa 50%-iilik pisartagaqarnissamut pisinnaatitaaffeqarput.

## UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

		pisartagaqanngitsoq)
--	--	----------------------

Taamaalilluni siunnersuut taamatut isikkoqartilluni siunnersuummut siunertaritinneqartumut naapertuutivinngilaq, tassami appasinnerpaaffissaattut killiussap kisimi allanngortinneqarnissaa siunnersuutigineqarmat. Tamatumani ajornartorsiut qitiulluinnartuq assersuusiornikkut takutinneqarsinnaavoq. Utoqqalinersiutilik kisermaa 112.000 – 228.000 akornanni saniatigut isertitaqartoq allannguutissatut siunnersuutit pineqartut tunngavigalugit isertitaqarnerunermigut aningaasartuuteqalernerussaaq. Ajornartorsiut ataani titartakkakkut takutinneqarpoq.



### Titartagaq 1:

Pisartagaqartitseriaatsikkut nutaakkut (aappaluttumik kipisaartumik titarnilik), allatigut isertitat amerliartuaartillugit sulinermit 1.000 kr.-nik isertitaqarnerunerup kingunerissavaa utoqqalinersiutit 1.000 kr.-t sinnerlugit ikilisinneqarnissaat. Taamaattumik utoqqalinersiutilik kisermaa sulinerulernermigut aningaasatigut ajornerusumik inissisimalissaaq.

## **UTOQQALINERSIUTILLIT ISERTITAANNUT KILLILIUSSAT ALLANGORNERANNIK NALILERSUEQQISSAARNEQ**

Siunnersuummi siunertarineqartoq naapertorlugu tamanna anguniagaanngimmat, siunnersuummi siunertarineqartoq malinniarlugu, allatigut isertitaqarnerup kinguneranik utoqqalinersiutit qaqugukkut 0 kr.-nngornissaannut (ullumikkut 228.000 kr.) qaffasinnerpaaffiliilluni malittarisaqartariaqarpoq.

Taamaattumik nalilersueqqissaarnermi matumani minnerpaaffissatut killiliussat aamma annerpaaffissatut killiliussat imminnut naapertuuttumik allangortinnissaat aallaaviusariaqarpoq. Tassalu minnerpaaffissatut killiliussat ima allangortinneqassapput utoqqalinersiutilik marloriaatinik saniatigut isertitaqarsinnaatillugu, annerpaaffissatullu killiliussat amerlaqataannik allangortinneqassallutik.

Minnerpaaffissatut killiliussat kisiisa allangortinneqarnissaat kisiat nalilersueqqissaarnermi aallaavigineqassappat, nalilersueqqissaarnerup inernerinnassavaa siunnersuutip siunertaminik eqqortitsisinnaannginnerata paasineqarnera.

### **4.0 Sunniuteqaqatigiinnermi ajornartorsiutit:**

Minnerpaaffissatut killiliussat aamma annerpaaffissatut killiliussat marluutillugit allangortinnerannik teknikkikkut annikitsortaatigut tunngaviusumik ajornartorsiut takutinneqarpoq. Tamanna pisariusuuvoq annikitsullu eqqarsaatigineqartariaqartut amerlaqaat. Annikitsumik allanguineq allanut tunngasutigut malunnaatilinnik kinguneqassaaq, pitsaasunik pitsaanngitsunillu.

### **4.1 Illugiilluni pilersoqatigiinnissamut pisussaaffimmik allanguinerit**

Kalaallit Nunaanni utoqqalinersiuteqartitsinermut atuuttumut tunngavigineqartut ilagaat illugiilluni pilersoqatigiinnissamut pisussaaffeqarnermik tunngaveqarneq; tassalu utoqqalinersiutillip utoqqalinersiutaanut tunniunneqartunut nammineq allatigut isertitarisinnaasai kisimik aalajangiisuuneq ajorput, kisiannili aamma katissimaguni inooqateqaruniluunniit taakkua isertitaat aamma aalajangiisuusarmata.

## UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

Siunnersuutikkut siunertatut kissaatigineqartumut naleqqiullugu, aamma Inatsisartuni oqallinneq tunuliaqutaralugu utoqqalinersiuteqartitsinermik aqqissuussinermik iluarsartuussilluni suleriaqqinnermi, taamatut tunngaveqarnerup tulluarsaqqinneqarsinnaanera ilanngullugu eqqarsaatigineqartariaqarpoq. Illugiilluni pilersoqatigiinnissamut pisussaaffiup allanngortinneqarnera utoqqaat suliffeqaannarnissamut piumassusaannik annertusisitsisinnaanera eqqarsaatigineqartariaqarpoq paasiniarneqartariaqarlunilu.

Utoqqalinersiutit pillugit peqqussummi aappariinnut (assigiinngitsunik aallaavilinnik isertitaqartunut) tunniunneqartussat aalajangersarneqartarput, utoqqalinersiutilinnut katissimasunut inooqateqartunulluunniit tunniunneqartussat pinnatik.

Utoqqalinersiutilinnut katissimasunut inooqatigiittunulluunniit ajornartorsiummut atuuttumut assersuut tassaavoq, inatsisit atuuttut naapertorlugit utoqqalinersiutilik allatigut isertitaqanngitsoq, nuliami/uimi inooqatigisamiluunniit isertitai apeqqutaatinnagit kisermaap utoqqalinersiutaasa 50%-iinik pisartagaqarnissamut pisinnaatitaaffeqarmat. Utoqqalinersiutilik taanna annikitsuaraannarmik isertitaqaruni, uia/nulia inooqataaluunniit aappariinnik pilersuinissamut tunngaviliisunik isertitaqarpat, pineqartoq utoqqalinersiuteqarnissamut pisinnaatitaafeerutissaq.

### **4.2 Pisortanit pisartakkat allat**

Utoqqalinersiutit isumaginninnikkut pisartagaapput, taamaattumik siunnersuutikkut siunertarineqartoq anguneqassappat. utoqqalinersiutit isumaginninnikkullu pisartakkat allat imminnut sunniuteqatigiittarnerat aalajangiisumik pingaaruteqarpoq. Assersuutigalugu utoqqalinersiutillip 50.000 kr.-nik qaavatigut isertitaqarnissamut periarfissaqartup ineqarnermut tapiissutisiami annikillineqarnerat aappaqarunilu aapparmi siusinaartumik soraarnerussutisiaasa annikillineqarnerat kingunertut malugissaa.



## **UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ**

### **4.3 Siusinaartumik soraarnerussutisianut naleqqiullugu utoqqalinersiutit allanngornerat**

Siusinaarluni soraarnerussutisiat utoqqalinersiutillu siusinnerusukkut imminnut attuumalluinnarsimapput, inatsimmilu ataasiinnarmi malittarisaqartinneqarlutik. Taamaattumik siusinaarluni soraarnerussutisiatut utoqqalinersiatullu tunniunneqartartut tungaviumik periutsit assigiissut annertussusilersugaasarput. Taamaattumik utoqqalinersiutilinnut tunniunneqartartut naleqqussarneqartarnerat siusinaartumik soraarnerussutisialinnut tunniunneqartartut naleqqussarneqartarnerannut imminnut attuumassuteqartilluinnarlugit pisarput. Ullumikkulli utoqqalinersiutinut aamma siusinaarluni soraarnerussutisianut malittarissat immikkoortinneqarnikuupput, qaffasissusaallu assigiinngitsuullutik. Taamaattoq inatsisini taakkunani marluusuni takuneqarsinnaavoq aappariinnut aappaa utoqqalinersiuteqartumut aappaalu siusinaarluni soraarnerussutisiaqartumut tunniunneqartartut assigiissasut.

### **4.4 Tunniunneqartartut allanngortinneranni siunissami pisinnaasut**

Utoqqalinersiutillu ataatsimoortumik assigiiaakannersutut isigineqarsinnaanngillat. Qassit utoqqalinissaminnut sipaagaqarsimanerat imaluunniit utoqqalinersiutinut sipaagaqarsimanerat, imaluunniit qassit sulisinnaassuseqarnerat il.il. eqqarsaatigalugit annertoqisumik assigiinngiiaarput.

Siunnersuutikkut utoqqaat aalassarissut, sulisinnaasut iluaquserneqarput.

### **4.5 Allannguutit utoqqaat pillugit periusissamut ilanngullugit eqqarsaatigisat**

UFA 2012-mi utoqqaat pillugit Naalackersuisut periusissiat Inatsisartunut saqqummiunneqarpoq. Utoqqalinersiutinik siunissami iluarsartuusseqqinnissat periusissiamit tassannga aallaaveqartussaassapput.

Naalackersuisut utoqqaat pillugit periusissiaq manna aqqutigalugu inuiaqatigiinni ineriartortitseqqinnissamik utoqqarnut iluaqutaasussamik tunaartarisassaliorput. Naalackersuisut takorloorpaat utoqqaat namminneq aalajangiinnaassuseq akisussaaqataanerlu aqqutigalugit pitsaasumik inuuneqarnissaat, inuiaqatigiillu utoqqaat

## UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

ataqqinassusilimmik inuunissaannut pisariaqartumik isumassuinissamik neqerooruteqarnissaat. Inuttut nammineq akisussaanissaq soraarnerussutisiaqarnissamullu nammineq akileeqataanissaq, utoqqaat pillugit periusissiami qulequtaapput pingaaruteqartut. Innuttaasut utoqqalinissaminnut namminneerlutik ileqqaaruteqarnissaat tamatumani Naalakkersuisut inassutigaat. Ilaatigut inassutigineqarpoq misissorneqassasoq inuussutissarsiortut tamarmik utoqqalinersiassaminnut pinngitsooratik ileqqaaruteqarnissaannut periarfissat suunersut, aamma inuussutissarsiortunut tamanut tunngatillugu kingusinnerusukkut soraarnerussutisiaqarnissamut kajumissaataasinnaasut siunnersuutigineqarput.

### **4.6 Sulisoqarnermut tunngatillugu siunissamut takorluukat**

Utoqqalinersiutilinnut aningaasaqarnikkut kajumilersitsisut allanngortinneqarpata, aamma assigiinngitsunik annertussusilinnik isertitallit imminnut naleqqiullutik annertussusaat aamma allanngortinneqassaaq.

Assersuutigalugu utoqqalinersiutillit allannguutissatut siunnersuutit atorlugit piffissami utoqqalinersiutinik pisartagaqarnermik saniatigut aningaasarsiaqarsinnaasut annertungaatsiartumik isertitaqarnissamut periarfissaqalissapput. Ataatsimoortut taakku assersuutigalugu ilinniagaqanngitsunut SIK naapertorlugu akissarsiat minnerpaaffissaannik aningaasarsiaqartunut utoqqalinersiuteqalernissamut suli ukiumikkut angusaqarsimanngitsunut, imaluunniit sulisoqartunut allanut isertitakitsunut naleqqiullutik isertitaqassutsimikkut inissisimallualertussaapput.

### **4.7 Utoqqalinersiutit isertitat naapertorlugit naleqqussartarneqartarnerisa peernerat**

Inatsisartuni oqallinnermut aamma siusinnerusukkut oqallittarnernut atatillugu oqaluuserineqartarpoq isertitat naapertorlugit naleqqussaasarneq peerneqavissanersoq, utoqqalinersiutillillu tamarmik utoqqalinersiutiminnik allannguiffigineqaratik suliarnissamut periarfissaqassanersut.

## UTOQQALINERSIUTILLIT ISERTITAANNUT KILLILIUSSAT ALLANNGORNERANNIK NALILERSUEQQISSAARNEQ

Tamatuma ilanngullugu kingunerissavaa utoqqalinersiutillit suliarnissamut periarfissaqartut, utoqqalinersiutilinnut taamatut periarfissaqanngitsunut aamma ilinniagaqanngitsunut SIK naapertorlugu akissarsiat minnerpaaffissaannik aningaasarsiaqartunut naleqqiullutik aningaasaqarnikkut pitsaalluinnartumik inissisimalernissaat. Tamatuma saniatigut tamanna Landskarsip annertuumik aningaasartuuteqalerneranik kinguneqassaaq. Aammattaaq ajornartorsiutit siusinnerusukkut taaneqartut imminnut sunniuteqaqatigiittarnerat ilaatinneqartariaqarpoq.

### 5.0 NAGGASIUT

Tungaviusumik apeqqut: "siunnersuummi atuuttumi aningaasatigut kinguneri tamarmiusut pitsaasuunersut" akiuminaappoq.

Soraarnerussutisiaqartitsilluni aqqissuussinermut atuuttumut akerliulluni oqaaseqaatit aalajangersimasut amerlaqisut, pingaartumillu utoqqalinersiutilinnut utoqqalinersiutit ilanngaaffigineqarnissaannut isertitanut killiliussat pillugit oqaaseqaatit pissusissamisoorput. Soraarnerussutisiaqartitsinermut aqqissuussineq atuuttoq sulinikkut isertitaqarnissamut kaammattuinnissamut aporfittut isigineqarsinnaavoq.

Taamaattoq soraarnerussutisiaqartitsinermut aqqissuussinermik allanngortitsisoqassappat allannguutit sunniutissaat maanna erseqqivinnigillat, inunnummi utoqqalinersiuteqalernissamut naammattunik ukioqalersimasunut isertitaqaannarnissamut qiimmassaataasut qanoq ittuuneri ilisimaneqanngimmata. Saniatigut isertitanut killiliussat marloriaatingortinnerat ajornerpaaffiini Landskarsip annertuumik aningaasartuuteqalerneranik kinguneqartussaammat.